

\tit 1881-P[erryman] article. P[erryman], L[egus] C. 1881. "Coka Mahaya." Indian Journal, August 4, 1881. Microfilm, State Historical Society of Wisconsin.

Coka Mahaya.

Coka mahaya Lapase hocefkE Tala-
hasse Mahaka koko oh afasta ...
Kaco-hase netta 27 omof yama ekana
enkapakatel os. Yama ekana en
hateceska yohceyate Ohrolope pale
tocenen toccenohkakat mahet os.
Yama ekana ohcey of manette make-
teket omis coka kerreta erespyet
omat eskerka etapoksalatet alakatet
os. Mohmet hopoetake mahaka oh-
ceyatel os. Momet hoere maketeket
hokte en heciken erashtet etemani-
cet Este Maskoke en hopoetake en
hayayake sehokare matalkosen sena
oricet sehoken atecicen horret alahken
mahaka afekhonnicephoyof Kasappo-
fan aconecikat Este catake kasappofa
sehokan em a hayet hoeren herka
hakof hatam Este Maskoke oh alaka-
tet os. Momet em atoketa acole
anke oh cehyet man senaoricet atos
ket hoeret ateciket oketa erespya tet
os. Este coka enkerreta ma omecat
hon heckeparanekis omeswites momet
Este hatke en facce ma omat hecar-
anekis ome wites. Este hatke, este
cate en hesse ma omat sepekis ome
wites.

Talwa-alke catokonawa rakraken
enke ohrolop omalkan em piket omen
sehalatka harpet omekis en faccetan
oh akasamet om hoyacokes komaken
afastet atecicen elkan eresoret os.
Momen naken yamah katet os makat
este sepekis omes momet anlaksenats
makat sekowites. Momet ahaka
ayecice essehokeyat senaoricet omates
makat sah sekos. Momis este facce
heret omates este Muskoke maket
omes, em atoketa en hayayake este
Maskoket sehoke atekat hecket ocar-
net omes. Momen oketa yamahket

ayecicen este manette hoporrenka
Omate ON honapseta acakayen hecke
haket ayaranet omes, ma omof pom
apayecet omat nomat kerkarant omes.
Este en hoporrenka acak ayen Etal-
wa atekat nekey alket omes, momen
estE Etalwa likat tatelkoka ma haka
alicecaten omat, ma Etalwat en
yekce oce mahat omes, monka mat
faccat on omat mahaya hon somkat
pofeke es nokkiceyetayet omet, en
coko ahoske efeknokketa hayat apay-
eeye tayet os. L.C.P